

Mintga di enzanu' auter cun skis

«Skisafari Surselva» – in project da pilot igl unviern vegnent en favur dalla regiun

DA HANS HUONDER / ANR

■ Igl unviern vegnent porscha l'interpresa da viadi Suter da Würenlingen ina «Skisafari Surselva». Duront in'jamna la fin schaner e l'entschatta fevrer san ils participonts da quella porschida ir mintga di enzanu' auter cun skis en Surselva. Il medem temps vegn era offeriu in'jamna da viandar en Surselva. Il venderdis avonmiezdi ha l'uniun Pencilularas Surselva salvau sia radunonza generala a Laax. Sper las trachandas ordinarias ein ils representants da quell'era sefatschentai dil project da pilot «Skisafari Surselva». L'idea per quella porschida deriva dil directur dalla Banca Raiffeisen Surselva, *Gabriel Casutt*: «Jeu hael gudiu ina tala porschida el Tirol dil sid e sundel staus dil meini che nus sapien era porscher entatgei semegliont en Surselva. Ussa daventa quei realitad ed il prezi per quels otgs dis da sport en Surselva ei buca pli aults ch'el Tirol dil sid.»

Da Glion anora

Quei project da pilot che vegn sustenius dallas pencilularas dalla Surselva sebasea igl unviern vegnent sin la porschida dil biro da viadi Suter da Würenlingen. El fa gia reclama persuerter. Ils hospis passentan otg dis en Surselva. Lur dimora han els el hotel Eden a Glion. Da cheu anora serendan els mintga di en in auter territori da skis dalla Surselva. Parallelmein e duront il medem temps vegn era porschiu in'jamna da viandar en Surselva cun la viseta dils medems loghens sco la safari da skis.



Igl unviern vegnent vegn il project da pilot «Skisafari Surselva» lantschaus: Otg dis da vacanzas cun sis dis da skis mintga ga enzanu' auter. MAD

«Quell'jamna porschida nus era ina sera culturala ed ina sera da folclora», di Casutt. El spera ch'ei reusseschi da plidentar 20 entochen 30 persunas per quella porschida. «Sch'il resun ei positivs eis ei secapecha pusseivel d'extender la porschida sin pliras jamnas», di Casutt ch'ei era gest il guid duront quell'jamna e meina aschia la glicud els differents territoris da skis. Pil president dall'uniun Pencilularas Surselva, *Maurus Tomaschett*, ei quei in'ulteriura buna porschida dalla Surselva: «Igl ei en sesez in pass da skis cun la differenza ch'ins va mintga di enzanu' auter cun skis. Nus essan spanegiai sigl interess.»

In unviern cuntenteivel

En siu emprem onn sco president dall'uniun Pencilularas Surselva ha Tomaschett saviu rapportar alla radunonza generala d'in onn da fatschenta cuntenteivel per la branscha da pencilularas ella regiun. «Tonaton buc ina stagiun tipica sco avon diesch onns, sco il monitoring dall'uniun da branscha Pencilularas Grischun muossa», constatescha il president. Igl unviern vargau han las pencilularas dil Grischun nudau in augment da hospis da biebin sis pertschien en cumparegliazium cugl onn avon ch'era staus in dils menders dils davos 15 onns. Ella media dils davos tschun

onn ei sedau in lev augment da 0,1 pertschien ed ella media da diesch onns ina reduziun da 7,4 pertschien. «En cumparegliazium cun la media da diesch onns se relativevescha il resultat claramein», constatescha Tomaschett. Cumparegliau cun la media dils davos tschun onns ei sedau in augment dalla sviulta da 0,1 pertschien. Cun in augment dad 8,3 pertschien dallas entradas primaras ei la Surselva stada igl unviern passau sil secund rang dallas regiuns grischunas. Ella media da tschun onns ei sedau in augment da 3,1 pertschien, ella media da diesch onns sto denton era vegnir constatau cheu ina reduc-

ziun da 3,7 pertschien. «Il svilup dallas frequenzas ed igl esit dalla stagiun d'unviern 2017/18 ein cuntenteivels en cumparegliazium cugl onn avon. En cumparegliazium culla media dils davos tschun onns obtegn igl unviern 2017/18 denton mo il predicat cuntenteivel cun potenzial ensi, nota bene, cuntegn gie quella cumparegliazium treis unviarns da pauca valeta», di Tomaschett.

Plirs novs indrezs

En siu rapport annual constatescha Tomaschett ch'il desideri dil sport d'unviern ei avon maun ella populaziun svizra. Cun empau dis da sulegl dapli fussi la fatschenta stada in toc meglia. Igl unviern vargau ha l'Arena da skis Andermatt Sedrun saviu metter en funcziun treis indrezs novs da transport. Las Pencilularas Sursaisa SA han saviu inaugurar la sutgera nova da Misanenga ad Untermatt. Tenor Tomaschett muossan las tendenzas che la fatschenta cul sport d'unviern duess semovar plaun a plaun ord il funs dalla val. La concorrenza ei e resta denton gronda, ton denter las regiuns en Svizra sco egl exterior. «Ussa ha ei num nezegiar il slontsch e dar peisa allas particularitads da nosa regiun. Il hosp duei survegnir l'impresiu che la neiv seigi pli leva e pli alva en Surselva», di Tomaschett. Ils prezis pil pass da skis dalla Surselva vegn dil reminent alzaus per 2,5 pertschien sigl unviern vegnent. Tenor Tomaschett ei igl alzament giustificau sin fundament dalla porschida extendida en plirs territoris da skis dalla regiun.

Di da fiasta e pagaglia bein meritada

Fiasta da diplom alla Scola professionala industrialia Surselva a Glion

■ (anr/hh) 46 da 51 emprendistas ed emprendists ha terminau cun success lur emprendissadi ed aschia la Scola professionala industrialia Surselva a Glion. El rom dalla fiasta da diplom ha la scola priu cumiau da siu magister Rino Deflorin e la deputada Silvia Casutt-DeRUNGS da Falera ha fatg entgens patratgs davart igl emprendissadi, il temps suandont e la muntada dalla scola professionala per la Surselva. «La fin dall'emprema part dalla scolaziun professionala ei in impurtont pass dalla veta.» Cun quels plaid ha il menader dalla scola *Alois Derungs* saviu beneventar il venderdis sera las diplomandas, ils diplomands, geniturs, fargliuns ed amirigs ell'aula dalla casa da scola da Glion. 90 pertschien dallas emprendistas e dils em-

prendists han terminau la scolaziun professionala cun success. Quei ei danovamein in bien resultat. La meglia nota totala ei vegnida contonschida uonn da *Samuel Cajacob* da Sumvitg. El ha absolviu igl emprendissadi sco electrocist da multimedia tier l'interpresa Arco Radio TV a Laax ed ha fatg la nota da 5,4. En num dil Center da formaziun Surselva ha Derungs saviu prender cumiau d'in apprezziau collega da lavur. Cun la fin digl onn da scola terminescha *Rino Deflorin* da Mustér numadamein siu engaschament tier la scola professionala per aschia entrar el temps da pensiun. 34 onns eis el staus fideivels a quella sco scolast professiona dils miradurs. «En quels biars onns ha el gidau a signar la scola ed ha aschia schaffu valurs cuzzontas. Deflorin ei denton adina era

staus in sustegn constructiv tier nos projects», puntuescha Derungs. La fiasta da diplomaziun ei vegnida enramada musicalmein da *Deborah Dietrich* ed *Esther Deck* dalla Scola da musica Surselva.

D'impurtonza per la regiun

Il plaid festiv alla fiasta da diplom dalla Scola professionala industrialia ha la deputada *Silvia Casutt* da Falera teniu: «Cura ch'il menader dalla scola, *Alois Derungs*, ha dumandau mei da tener quei plaid hael jeu empruau da seregurdar vid mia fiasta da diplom. Quei ei biars onns anavos, mo jeu seregordel aunc fetg bein da quei mument. Jeu erel loscha, gie fetg loscha, d'haver terminau mia scolaziun cun success. In buordi ei curdaus da mia schuiala ed jeu havevel il sentiment ch'jeu sappi embratschar igl entir mund. Jeu erel dil meini ch'igl entir mund spetgi sin mei, mo hael spert fatg persenn che quei ei buca aschia. Adina puspei hael jeu stuiu secumprovar.» La fin digl emprendissadi seigi in punct culminont ella veta, ussa hagi ei denton num esser aviarts pil niev e per novas sfidas e quei cun toleranza, capientscha, pazienza e perseveranza. Casutt ha denton era tematisau il liug da scola Glion: «Cun visitar la scola cheu haveis vus contribuü al manteniment dalla Scola professionala industrialia a Glion. Buca tuts patrums ed emprendists nezegian la pusseivladad dil model da splitting da visitar parts da lur scola a Glion. Per mei eis ei clar che quei ei cumbinau cun in'ulteriura stenta, mo igl ei la suletta via per mantener la Scola professionala industrialia a Glion.» Aschia seigi ei pusseivel da mantener plazzas da lavur ella regiun e salvar quella attractiva: «Il svilup demografic empermetta buca bia bien e gest per quei motiv essan nus dependents dalla solidaritad, loialitad e dalla bunaveglia enviers nosa regiun. Sche quella bunaveglia ei avon maun eis ei politicamein pli simpel da pretendere

dil cantun da mantener ils loghens da scola decentral e da metter a disposiziun ils mieds finanzials persuerter.»

Miradurs

Eric Andreoli, Laax, Richard Schmid SA, Glion; Davide Beer, Rabius, Beer SA, Rabius; Livio Cajochen, Sumvitg, Beer SA, Rabius; Nico Coccia, Rueun, Caprez Bau SA, Glion; Pascal Giger, Trun, Berther Bau ed Industrie SA, Mustér.

Scrinaris

Daniel Buchli, Valendau, Casaulta Holzwerkstatt GmbH, Sagogn; Sven Casanova, Vignogn, Gartmann SA, Lumbrein; Hannes Casutt, Val S. Pieder, Coray Holzbau SA, Glion; Flurin De Antoni, Sursaisa Cuort, Coray Holzbau SA, Glion; Ursin Decurtins, Sedrun, Giossi SA, Rueras; Severin Deflorin, Mustér, Scrinaria Flepp SA, Mustér; Mauro Fontana, Flem Vitg, Scrinaria Camathias SA, Laax; Corina Venzin, Curaglia, Scrinaria Flepp SA, Mustér.

Specialists d'automobilis

Ian Camenisch, Ladir, Auto Friberg SA, Rueun; Gian-Luca Coray, Laax, Garage Caffisch SA, Schluein; Joshua Lombriser, Trun, Radical Sports cars Schweiz GmbH, Trun; Denis Spescha, Andiastr, Auto Beeli SA, Glion; David von Niederhäusern, Glion, Auto Derungs SA, Glion.

Pasterner-pastizier-confisier

Matteo Bergamin, Danis, Pasternaria-conditoria Romana, Laax; David Caduff, Cumbel, Pasternaria-conditoria Caduff SA, Glion; Fabian Cajochen, Degen, Pasternaria Simmen GmbH, Sursaisa.

Carossier

Fabian Coray, Ruschein, Carossaria Pieder Coray GmbH, Glion.

Installaturs d'electro

Sandro Cavegn, Breil, Alpiq InTec Ost SA, Glion; Manuel Häny, Castrisch, Elektro Cadruvi SA, Glion; Ursin Jacomet, Mustér, Alpiq InTec Ost SA, Glion; Claudio Venzin, Curaglia, Alpiq InTec Ost SA, Glion; Romina Wieland, Cumpadials, Alpiq InTec Ost SA, Glion; Jimmy Zoetmulder, Breil, Alpiq InTec Ost SA, Glion.

Specialist pil manteniment dil menaschi

Damian Cahannes, Dardin, Administraziun communal Ilanz/Glion.

Specialista pil tenercasa

Anna Casanova, Cumbel, Casa da vegls ed attempai Glion.

Postger

Lucas Flepp, Danis, Revier forestal Breil.

Installatur da scaldaments

Nic Emanuel Monn, Danis, Casatec SA, Mustér.

Decoratura interior

Lea Volken, Dardin, Cathomas Maurus SA, Glion.

Cuschiniera

Angela Capaul, Lumbrein, Spital regional Surselva.

Mecanists da maschinas agricolas

Damian Caminada, Vrin, Garage Solèr, Lumbrein; Andreas Tönz, Val S. Pieder, S. Montalta GmbH, Glion.

Electricists da montascha

Joel Berther, Mustér, Electro Cadi SA, Mustér; Fabrizio Della Valle, Trun, Electro Livers SA, Schluein; Rui Filipe Gomes Machado, Glion, Derungs SA, indrezs electrotecnicos, Glion.

Electrocist da multimedia

Samuel Cajacob, Sumvitg (5,4), Arco radio tv hifi video, Laax; Fabio Gabriel, Vrin (5,3), Surselva Multimedia SA, Glion.

Polimecanists

Pascal Huonder, Segnas, Distec SA, Mustér; Aluis Manetsch, Mumpé Medel, Distec SA, Mustér.

Electricist da reit

Pascal Cavigelli, Siat, Repower SA, Glion.

Installaturs sanitaris

Sandro Camenisch, Morissen, Caduff tecnica da casa SA, Glion; Jan Giossi, Mustér, Casatec SA, Mustér.

reclama



Samuel Cajacob da Sumvitg ha contonschiu la meglia nota alla Scola professionala industrialia Surselva. Igl electrocist da multimedia ha schau nudar in 5,4. La foto muossa el ensemen cul menader dalla scola *Alois Derungs*. FOTO H. HUONDER